

Ehekushon Egoísta

Juancho ta bisa Linchi kuantu e ta stim'e. Ora Linchi ta respondé ku e ta stima Juancho, e yònkuman ta demanda, "Proba ku bo ta stimámi!" Linchi, ku miedu di pèrdè Juancho, ta entregá.

Shete siman despues, un Linchi desesperá ta buska Juancho. E ta na estado. Kiko e mester hasi awor? E tin 16 aña so. E ke kaba skol. Kiko hende lo bisa si nan haña sa? "Ai, ta fásil," Juancho ta sigur'e. "Tira yu afó!" Linchi su amiga tambe ta konsehá pa abortá. Un dòkter komplasiante ta yena un formulario pa fasilidat esaki.

Kisas bo a yega di hañábo den e mesun situashon ku Linchi. Of kisas bo a konsehá un otro "Linchi" desesperá pa tuma e mesun medida. Ma bo a para ketu evaluá bo konseho bon?

Bida humano ta kuminsá na konsepshon. For di momentu ku simia di e hòmber ta fertilisá webu di e muhé, e milager di formashon di un ser humano ta inisiá.

Solamente dos siman despues di konsepshon, kurason di e beibi ta bati okashonalmente i 14 dia despues e ta bati regular. Seis siman despues di konsepshon e glándulan an adrenal i tiroideo ta funshoná normal. Skeleta di e yu ta forma i su muskulonan ta kuminsá move ku 48 dia. Ora e beibi den matris tin entre seis pa ocho siman, por nota aktividat selebral. E aktividat di sesu, similar na esun di un adulto ora e ta na soño, no ta kambia diripiente ora e beibi ta nase. Ku 56 dia por identifiká sekso di e yu. Pa su di diesdos siman, por nota ku e beibi tin un deseño úniko riba su dedenan ku ta identifik'é for di tur otro ser humano. Ku tres luna e yu por chupa dede, tene, i sera wowo. E desaroyo di su pulmon i sesu ta kasi kompletá. Ku 16 siman e beibi tin kabei i kisas e mama por sinti su moveshon. Ora e yu tin seis luna, su organonan ta kompletamente desaroyá. E por tende i por rekonosé stèmnan. Tin pusibilidat ku e por keda na bida pafó di matris awor.

Ku e aparatonan sofistika ku médikonan tin na nan disposishon awendia, ta pusibel pa mira bo yu den matris move su mannan i pianan, chupa dede, bòlter, tene su kabuya di lombrishi i uriná. E aparatonan ta revelá bon kla ku e beibi ta un ser humano, sea e ta paden òf pafó di matris. Nasementu ta solamente un evento den bida di e person chikitu aki. Parto no ta **hasi** e kriatura un ser humano.

Nos komunitat lo keda di shòk si un mama a mata un beibi ku a kaba di nase. Ma si e laga mat'é algun luna promé ku e nase, nos ta haña esei masha normal. Si e nase, e ta un ser humano protehá pa lei. Ma si e ta den matris, e outoridatnan konserní ta sera wowo pa ku e leinan eksistente mientras sierto médiko kruelmente ta kap e ser humano chikitu na pida pida.

Juancho i Linchi ta pensa solamente di nan mes, nan reputashon, nan deseonan, nan plannan... egoísta! Un beibi lo interferí ku loke nan ta kere ta nan derechonan. Ma e beibi no tin derecho?...ni derecho di bida? Linchi tin derecho di mata su beibi pa haña su diploma? Ta pèrmisibel pa mata pa skonde nan akto immoral? Si un kriminal mata pa haña un dokumento òf pa hende no haña sa kiko el a hasi, esei ta kastigabel. Pakiko anto no tin kastigu pa esun ku mata un beibi inosente indefenso?

Ta berdat, Linchi ku su 16 aña no ta kla pa kria un yu. Ma esei no ta ekskusá nan di ignorá Palabra di Dios. E Dies Mandamentunan ta bisa "No kometé adulterio" (Eksodo 20:14). Relashon seksual fuera di matrimonio, ta un akto di egoísmo, no stimashon. I sigur e no ta hustifiká ehekushon di nan beibi. E Dies Mandamentunan tambe ta bisa, "No mata" (Eksodo 20:13). Hopi hende ta purba skonde un piká (inmoralidat) ku un otro piká (aborto). Ma un piká no por rektifiká e promé piká. Segun Dios Su konteo, 1 piká + 1 piká = 2 piká!

Aborto ta kita bida di un ser humano inosente, ku nunca por mira klaridat di dia, hala rosea, hari, sinti e amor di su mama. "No mata" ta apliká na bida humano tantu paden komo pafó di matris. Aborto ta e piká di asesinato, un ehekushon egoísta.